



Komentáriu husi La'o Hamutuk ba Enkontru Parseiru Dezenvolvimentu Timor-Leste iha 2016 4 Julu 2016

Konteúdu

Orsamentu Estadu no ekonomia Timor-Leste seidauk sustentável.....	1
Pobreza la bele elimina bainhira ita la investe ba povu.....	4
Timor-Leste tenke muda nia karáker konsumu.....	5
Infrastrutura tenke sustentável no fó benefísiu ba povu.....	6
Ita-boot sira bele respeita direitu soberania ba Tasi Timor.....	7


La'o Hamutuk nudár organizasaun sosiedade sivíl ida iha Timor-Leste ne'ebé dezde liu dékada ida ho balu halo analiza no monitorizasaun ba prosesu dezenvolvimentu iha Timor-Leste. Objetivu hosi knar ida ne'e atu promove dezenvolvimentu ida ne'ebé sustentável, ekilíbriu no adekua ba povu Timor-Leste tomak.

La'o Hamutuk, Forum ONG no organizasaun sosiedade sivíl sira seluk sempre partisipa iha Enkontru Parseiru Dezenvolvimentu Timor-Leste nian dezde 2001. Durante tinan tolu ikus ne'e, Governu sempre konvida ami atu ba ko'alia kona-ba Setór Ekonomia Estratéjiku nian. Ami sente triste katak laiha apresentasaun ka observasaun sira hosi sosiedade sivíl sira iha agenda ba enkontru iha tinan ida ne'e.


Nune'e, liu hosi komentáriu ida ne'e, ami hakarak atu kontinua fó ami nia komentáriu ba ita-boot sira hodi nune'e bele sai hanesan perspetiva ba ita-boot sira hodi tulun ami nia Governu hodi halo dezenvolvimentu ida ne'ebé benefisia ba Povu Timor-Leste tomak.

Orsamentu Estadu no ekonomia Timor-Leste seidauk sustentável.

Dezde Timor-Leste nia restorasaun independénsia, ekonomia no finansa públiku nian hetan influensia maka'as hosi doasaun hosi parseiru dezenvolvimentu no reseita sira hosi rekursu naun renovavel petróleu duke rendimentu doméstiku sira hosi atividade ekonomia naun petrolíferu. Hafoin Timor-Leste estabese nia Fundu Petrolíferu iha dékada ida liu ba, dezde iha 2007 rendimentu mina-rai ne'e domina tiha ekonomia no atividade estadu nian. Durante tinan sanulu ikus ne'e, doadór sira kontinua hamenus maka'as sira nia apoiu mai Timor-Leste. Iha 2016 doadór sira sei kontribui menus hosi 10% hosi total Fundu Kombinadu Timor-Leste.



Iha 2016, 82% Orsamentu Jerál Estadu ne'e mai hosi Fundu Petrolíferu, no utoan liu mak mai hosi rendimentu doméstika nian. Aleinde ne'e, 61% hosi Timor-Leste nia Produitu Interna Brutu (PIB) iha 2014 nafatin mai hosi atividade mina-rai. Númeru ida ne'e tun husi 76% iha 2012 tanba GDP petrolíferu iha 2014 tun 50% dezde 2012, maibé ekonomia naun-petrolíferu aumenta de'it 9% durante tinan rua 2012-2014.




Relatóriu *Konta Nasionál 2000-*

2014 ne'ebé foin publika daudauk ne'e hatudu hela figura mai ita katak Timor-Leste nia PIB total iha 2014 tun 28% kompara ho PIB 2013. Fenómenu ida ne'e akontese tanba produsaun tun depois 2011, no estraga liu tan ho presu mina-rai mundial ne'ebé tun maka'as iha 2014. Timor-Leste nia reserva besik atu supa hotu ona. Durante fulan Janeiro-Maiu 2016, produsaun iha JPDA rata-rata tokon 4.2 barril kada fulan, kompara ho tokon 6.2 durante 2012. Ohin loron, reserva ida ne'e menus ona hosi 6%. Reserva restu ne'e tomak iha Bayu-Undan, ne'ebé hein de'it tinan lima tan atu maran, Kitan maran ona no taka ona iha fin 2015.

Figura sira iha leten ne'e hatudu hela katak ekonomia Timor-Leste la'õ hela iha dalan ne'ebé la sustentável. Bainhira kampu Greater Sunrise nian la bele dezenvolve tanba problema disputa fronteira maritima nian entre Timor-Leste ho Australia no mós tanba seidauk iha konkordánsia ho kompañia sira kona-ba fatin ne'ebé di'ak liu tan atu halo prosesamentu gas natural nian. Nune'e iha tinan 2021 hafoin Bayu-Undan maran, ekonomia no atividade estadu nian sei depende de'it ba Fundu Petrolíferu ne'ebé nia dezempeñu depende de'it ba merkadu asoens no política despeza estadu nian. Iha fin de fulan Maiu 2016, saldu iha Fundu Petrolíferu biliaun \$16.6, iguál ba saldu bainhira fulan Juñu 2014 remata. Timor-Leste atinje ona saldu másimu biliaun \$17.1 tinan ida liu ba, no ita dezeña hela atu hamenus osan sira ne'ebé ita rai ne'e hodi selu ba atividade estadu nian.

Iha Orsamentu Jerál Estadu 2016, Governu kontinua viola regra sustentabilidade iha Lei Fundu Petrolíferu hodi kontinua foti liu Rendimentu Sustentável Estimativa (RSE). Maske Governu hateten katak asaun ida nee atu kontinua estratéjia dezenvolvimentu infrastrutura atu bele dudu kreximentu ekonómiku nasaun nian no melhora kondisaun moris populausaun nian.



Ba OJE 2016, Rendimentu Sustentável Estimativa ne'e hamutuk tokon \$545, infelizmente Governu hakarak atu foti biliaun \$1.28 hosi Fundu Petrolíferu.¹ Montante osan ne'ebé foti iha tinan 2016 ne'e


¹ Fulan kotuk, Konsellu Ministru propoin atu halo orsamentu retifikativu ida hodi aumenta Orsamentu Jerál Estadu 2016 hodi ba selu konstrusaun infrastrutura sira ne'ebé nia planu fraku tebes. Bainhira Parlamentu aprova ida ne'e, levantamentu hosi Fundu Petrolíferu iha 2016 sei boot liu tan.

ekivalente ho 7% hosi riku soin petróleu Timor-Leste nian, no nudár persentajen ida ne'ebé as liu durante ne'e Timor-Leste foti hosi Fundu.

Infelizmente, maioria OJE 2016 ne'e atu aloka de'it ba projetu sira ne'ebé nia retornu la iha serteza no mós fó benefisia de'it ba kompañia hosi rai li'ur sira, duke povu Timor-Leste rasik, no trai tiha prinsipi Fundu Petrolíferu atu benefisia jersaun ohin no aban bainrua nian.

Dezde iha tinan 2015, Governu Timor-Leste hakarak atu atinje Objektivu Dezenvolvimentu Sustentável (ODS) 2015-2030, objetivu ida ne'ebé hanesan ba parseiru dezenvolvimentu sira hodi hakarak atu Timor-Leste atinje mos. La'ó Hamutuk sujere katak objetivu ida ne'e bele atinje de'it bainhira adopta polítika sira ne'ebé sustentável liu hosi diversifika ekonomia Timor-Leste hodi investe iha setór agrikultura, peska, turizmu, indústria ki'ik no mós fontes ekonomia naun petrolíferu sira hodi nune'e bele substitui rendimentu mina-rai nian no ajuda Timor-Leste hodi atinje dezenvolvimentu ekonomia ida ne'ebé sustentável.

Ami fiar katak Timor-Leste sei labele atinje dezenvolvimentu sustentável bainhira polítika fiskál nian labele tuir dalan ne'ebé sustentável mós. Parseiru dezenvolvimentu mós bele ajuda no enkoraja Governu atu la'ó iha dalan ne'ebé sustentável liu hosi fó asesoria ho jestaun ekonomia sira ne'ebé sustentável sira, la'ós fó konsellu hodi dezeña polítika sira ne'ebé halo Timor-Leste monu maka'as liu tan ba dependénsia petróleu ka fakar osan arbiru ba polítika sira ne'ebé benefisia ema uitoan sira duke povu ki'ik sira.




Iha de'it ona tinan lima atu rendimentu mina-rai no gas atu para iha 2021. Timor-Leste bele halo hotu osan sira ne'ebé ita rai iha ita nia Fundu Petrolíferu. Ida ne'e bele evita bainhira polítika sira ohin loron nian ne'e muda maka'as, Governu sei kua maizumenus 90% nia orsamentu estadu. Bainhira ita la'ó ho despeza anuál ne'ebé menus hosi token \$300 (valor dolar iha 2016), oinsá Governu bele fornese servisu esensíal sir aba nia sidadaun na'in token 1.4?

Pobreza labele elimina bainhira ita la investe ba povu.

Iha Timor-Leste, liu metade populasaun mak sei moris iha pobreza extrimu no númeru ida ne'e sei kontinua sa'e ba bei-beik. ² Kauza boot hosi pobreza iha Timor-Leste ne'e akontese tanba Governu falla atu investe ba maioria povu ne'ebé moris iha area rural, ne'ebé barak liu mak moris ho agrikultura subsistensia. To ohin loron maizumenus 1,200 labarik ho idade menas hosi tinan lima mate hosi kondisaun ne'ebé bele prevene, tanba ita seidak tau matan ba povu nia problema saúde, sanitasaun no malnutrisaun.


Bainhira Governu labele muda nia política hodi investe nia povu rasik, nivel pobreza sei maka'as liu tan. Ohin loron, maizumenus 28,000 joven sira ne'ebé to ona idade traballu, maibé oportunidade servisu sei limitadu tebes, no númeru ida ne'e sei sa'e tan bainhira labarik sira ne'ebé foin moris hafoin 2002 tama ba kampu servisu iha tinan tolu ka haat oin mai, tempu ida ne'ebé rendimentu husik Bayu-Undan remata ona.



Ami hanoin katak Governu no parseiru dezenvolvimentu sira tenke investe ba kriasaun kampu traballu ida ne'ebé barak no sustentável, la'ós de'it loke kampu servisu sira ne'ebé depende ba projetu Governu nian ne'ebé ba temporáriu de'it.

Ami enkoraja ita boot sira hodi bele fó apoiu ba kriasaun indústria ki'ik sira atu prodús nesesidade lorloron povu Timor-Leste nian. Indústria sira ne'e tenke sadere ba utilizausaun material prima sira ne'ebé ita nia agrikultór no peskadór sira prodús hodi nune'e bele ajuda sirkulasaun osan ba ema sira ne'ebé hela iha area rural, hodi evita dezigualdade sosiál tanba osan suli de'it ba sidade sira.

Aleinde ne'e, forma seluk ba redusaun pobreza mak hadi'ak sistema protesau sosiál ida ne'ebé sustentável no ekilibriu ba povu Timor-Leste tomak. Ohin loron, Governu aloka osan barak ba, veteranu, idozu, pensaun vitalisia no bolsu sira ba ema kbiit laek sira. Infelizmente, sistema protesau sosiál ida ne'e seidak promove prinsipiu justisa ekonomia, sosiál no mós laiha sustentabilidade tanba



² Infelizmente, *Survey Living Standard 2014* ne'ebé seidak publika, nune'e iha estimasaun de'it, bele hetan observaun ba projesaun no anekdot sira.

depende ba orsamentu jerál estadu no mós elite polítiku sira no nia família hetan protesau n soslál ida ne'ebé luxu liu duke ema bai-bain sira.


Ami sujere katak protesau n soslál ida ne'ebé sustentável no ekilíbriu liu mak kontinua ho tratamentu saúde ida ne'ebé gratuita hosi ospitál no klínika sira iha Timor-Leste laran tomak ne'ebé loke servisu durante 24 oras ho ekipamentu médiku no ai-moruk ne'ebé kompletu ho profesional saúde sira ne'ebé ho kualidade no efetividade mós.

Aleinde ne'e, sistema edukasaun mós tenke melhoria liu hosi harii eskola sira ho facilidade sira hanesan bee no saneamentu, kurikulum, laboratóriu, mestre/a ne'ebé iha dedikasaun dí'ak no oras aprendizajen ne'ebé suficiente. Ohin loron, labarik barak, liu-liu ema kiak sira nia oan ne'ebé hela iha area rural, mak seidauk bele asesu ba edukasaun ida ne'ebé adekua tanba falta facilidade eskola, laiha livru no profesór, no mós oras aprendizajen ida ne'ebé sei kontinua menus. Ami kontente tebes ho kurikulum foun ba ensinu primária sira, no espera katak Governu no parseiru dezenvolvimentu sira sei asegura katak kurukulum ida ne'e tenke implementa ho luan no efetivu liu.

Tanba ne'e, ami enkoraja Parseiru Dezenvolvimentu sira hodi fó apoiu ba dezenvolvimentu edukasaun, saúde, agrikultura no mós kriasaun indústriá ki'ik sira atu bele redús dezigualdade soslál no haforsa ekonomia iha Timor-Leste ba tempu naruk.

Timor-Leste tenke muda nia karákte konsumu.

Tinan-tinan, Timor-Leste moris dependente ba sasán importasaun nian. Iha 2014, Timor-Leste enfrenta defisit hosi saldu merkadoria nian hamutuk biliaun \$2.080 (hosi total bens e servisu). Ba sasán de'it iha 2015, ita enfrenta defisit tokon \$562 enkuantu ita nia esportasaun (laho mina no gas) iha de'it tokon \$16 ne'ebé 95% mai hosi fan kafé.



Dependénsia ba importasaun ida ne'e hafraku tiha Timor-Leste nia ekonomia tanba maioria osan labele sirkula iha ekonomia rai laran maibé tenke semo ba rai sira ne'ebé ita importa sasán. Maske maioria povu Timor-Leste moris iha setór agrikultura, maibé ita kontinua importa foos no aihan seluk hosi rai li'ur. Iha 2015, ita gasta besik tokon \$100 atu importa aihan, inklui tokon \$26 ba foos no sereál sira seluk no gasta tokon \$30 ba bebidas.

Iha fatór barak mak fó influénsia ba Timor-Leste hodi importa aihan tanba ita nia produsaun agrikultura iha rai laran sei menus, Governu la motiva ba agrikultór sira hodi prodús, la fó prioridade ba agrikultura, rai agrikultura barak mak la bele prodús tanba dezeña hela ba futuru mega projetu naun agríkola nian. Tuir mai, ema barak mak la prioriza produktu lokál iha sira nia menu no karákte konsumu nian hodi sadere de'it ba aihan sira ne'ebé mai hosi rai li'ur ne'ebé dala barak menus nutrisaun kompara ho produktu lokál. Timor-Leste nia nasionalismu ekonómiku labele haketak hosi hakarak ba soberania polítika nian.

Ami sujere atu importasaun ida ne'e tenke hamenus liu hosi dezenvolve ita nia indústriá atu prodús sasán báziku sira no mós enkoraja estadu, setór privadu no parseiru dezenvolvimentu sira atu investe maka'as ba produsaun no prosesamentu agrikultura nian. Ami fiar katak setór agrikultura mak esensiál ba dezenvolvimentu ekonomia ida ne'ebé sustentável. Infelizmente, projetu balu ne'ebé Parseiru

Dezenvolvimentu sira halo iha setór agrikultura iha Timor-Leste dala barak kontradikte ho prinsípiu dezenvolvimentu ekonomia nian, hanesan promove fini, adubu, pestisida sira ne'ebé la orgánika sira.

Tanba ne'e, La'ó Hamutuk sujere ba Parseiru Dezenvolvimentu sira no mós Governu Timor-Leste atu promove agrikultura ida ne'ebé sustentável hodi prodús produktu sira ne'ebé orgánika, implementa pratika agroekolojia; promove input orgánika, forma setór agrikultura absorve forsa laboral. Buat sira ne'e sei hatún dezempregu no fornese ambiente servisu di'ak ba produtór ki'ik sira; no mós bele asegura produtór ki'ik sira hodi iha asesu ba fatór produsaun sira hanesan rai produtivu, bee, fini lokál, no material báziku seluk. Ami mós suporta meius sira ne'ebé hakarak atu aumenta valor ba agrikultura Timor oan sira ho luan liu tan, hanesan programa toos eskola, hadi'ak pozisaun sosiál no ekonómiku agrikultór sira no enkoraja joven sira atu kontinua vokasaun ba agrikultura ne'ebé sira nia inan aman rai hela mai ita.

Infrastrutura tenke sustentável no fó benefísiu ba povu.

Iha Orsamentu Jerál Estadu 2016, infraestrutura fíziku hetan porsaun 44%, no proposta Orsamentu Retifikativu sei aumenta porsaun ida ne'e liu tan. Projetu Tasi Mane ho nia komponente sira no projetu sira iha relasaun ho ZEESM kontinua hetan atensaun maka'as duni kompara ho setór bee mós no saneamentu. Projetu sira ne'e dezde iha inísiu hamosu preokupasaun kona-ba nia impaktu ekonomia, sosiál no ambientál nian, no mós nia viabilidade ekonómiku nian

Projetu Tasi Mane ne'e sei depende ba destinu Kampu Greater Sunrise, infelizmente, disputa fronteira marítima entre Timor-Leste ho Australia, desizaun hosi ami nia Governu atu harii planta LNG iha rai maran (ne'ebé kompañia sira hateten katak ida ne'e sei hamenus rendimentu no lukru), halo futuru dezenvolvimentu kampu Greater Sunrise nian sai la serteza. Maske nune'e, sira ne'ebé servisu iha setór petróleu iha Timor-Leste kontinua halo kampaña katak mina-rai iha Tasi Timor sei la maran no injekta otimizmu la realistiku ida ne'ebé maka'as hodi enkoraja Governu Timor-Leste atu fakar osan barak tan ba setór naun renovavel, ho kustu ida ne'ebé boot no la sustentável ida ne'e. Aleinde ne'e, iha tinan ida ne'e Governu mós aloka tokon \$218 ba projetu ZEESM iha Oecusse ne'ebé nia planu despeza futuru ka nia planu ekonómiku, sosiál no ambientál sei taka ba públiku.

Maske sira ne'ebé responsavel ba projetu sira ne'e kontinua halo esklaresimentu polítika atu konvense lider polítiku no povu Timor-Leste, maibé La'ó Hamutuk nia projesaun hatudu katak projetu sira hanesan ne'e sei hafraku sustentabilidade fiskál Timor-Leste nian, espesialmente bainhira mina-rai maran tiha ona. Ita seidak hare analiza merkadu ne'ebé objetivu no ekonómiku ida ne'ebé bele justifika kustu finansseiru, sosiál, rai no ambientál no nia risku sira menus liu kompara ho benefísiu no retornu ne'ebé projetu sira ne'e sei lori mai ba Timor-Leste nia ekonomia, finansseiru no povu.

Kanselasaun kontratu Suai Supply Base foin daudauk ne'e tanba prosesu aprovizion-amentu ida ne'ebé inválidu hodi loke oportunidade atu halo avaliasaun fila fali ba Projetu Tasi Mane tomak, hodi iha poténsia boot atu poupa osan liu biliaun sanulu hosi despeza la produtivu ida.

Iha lidun seluk, doador sira mós dudu Governu Timor-Leste hodi implementa projetu infra-estrutura sira seluk ne'ebé sei gasta osan bar-barak ho tipu oi-



COMISSÃO NACIONAL DE APROVISIONAMENTO
MINISTÉRIO DO PLANEAMENTO E INVESTIMENTO ESTRATÉGICO

Intent to Award

Tender Number	Description	Winning Contractor	Contract Price
ICB/012/MPMR-2013	Design and Construction of Suai Supply Base	Hyundai Engineering & Construction Co., Ltd / Hyundai Engineering Co., Ltd (HDEC-HEC) consortium	USD: 719,212,000

The National Procurement Commission will respond to any protest in writing received at the Office of the National Procurement Commission, Rua dos Direitos Humanos, Díli, Timor-Leste no later than five (5) working days from the posting of this tender result.

Timor-Leste no Hyundai Engineering asina ona kontratu ho valor tokon \$719 iha 27 Agosto 2015. Kontratu boot liu iha istória nasaun nian, liu montante total gastu ba edukasaun hafoin restorasaun independénsia iha 2002.

Hyundai tama ona iha "lista metan" husi governu Korea, tanba sira halo kolusaun.




Aniceto do Rosario
National Procurement Commission
Dated: 12 June 2015

oin. Tipu ida mak Parseria Públiku-Privadu (PPP) ne'ebé Korporasaun Finansa Internasionál – International Finance Corporation (IFC) hosi Grupu Banku Mundial nian promove hela dezde tinan 2012.

Foin daudauk ne'e, Governu Timor-Leste asina ona kontratu PPP ida ho kompañia Bolloré hosi Franca atu harii no operador ba portu foun ba kontentór ida iha Tibar. La'ó Hamutuk preokupa tebes ho nia nia kondisaun kontratu nian kona-ba oinsá atu fahe risiko no lukru entre kompañia operador ho Timor-Leste, tanba dala ruma Governu Timor-Leste mak sei selu retornu ba Bolloré, espesialmente karik Portu Tibar la bele halo osan nato'on atu rekupera investimentu husi kompañia no estadu (tanba la halo projesaun ne'ebé realistiku).

Tipu projetu seluk ne'ebé parseiru dezenvolvimentu sira promove tan mak fó empréstimu ba Governu atu halo infrastrutura sira. Maske ami hanoin katak Timor-Leste prezisa duni infrastrutura sira ne'ebé adekuaudu duni iha Timor-Leste, maibé ami hanoin mós katak finansia projetu ida ne'e liu hosi dalan empréstimu nudár polítika ida ne'ebé la matenek. Hanesan ami deskreve ona antes katak iha tinan lima oin mai, Timor-Leste nia



kampu produsaun ohin loron, Bayu-Undan sei laiha ona. Entaun, empréstimu ida ne'e sei selu ho Fundu Petrolíferu nia funan no rendimentu doméstika, riku soin úniku ne'ebé Timor-Leste iha ne'ebé mós labele dura ba tinan naruk tan karik polítika despeza Governu nian kontinua la muda nia direisaun. Karik estadu empresta osan biliaun ida resin hanesan prevista iha OJE 2016, iha tinan sanulu tuir mai Timor-Leste sei selu tusan tokon \$100, ekivalente ho $\frac{1}{4}$ hosi reseita doméstiku estadu nian.

Ami kontinua husu ba Parseiru Dezenvolvimentu sira atu labele promove polítika sira ne'ebé sei hafraku Timor-Leste nia riku-soin ohin loron hodi ameasa ba jersaun futuru sira nia tempu. Objetivu dezenvolvimentu ne'ebé ita-boot sira promove ohin loron sei lori Timor-Leste ba kiak, krize polítiku sosiál, no hamlaha ida ne'ebé maka'as liu iha loron aban.

Ita-boot sira bele respeita direitu soberania ba Tasi Timor.

Hanesan ita-boot sira hotu akompañia katak ohin loron Timor-Leste hakarak atu reafirma nia direitu soberania ba Tasi Timor tuir prinsípiu no direitu internasionál. Ami nia soberania ne'e okupa ona kleur durante dékada naruk nia laran hosi Australia, nasaun viziñu ida ne'ebé ohin loron sei kontinua nudár doadór bo'ot liu mai Timor-Leste.

Foin lalais ne'e, Movimentu Kontra Okupasaun Tasi Timor (MKOTT), forsa



popular ida ne'ebé kompostu hosi estudante, ativista, organizasaun sosiedade sivil no eis grupu rezisténsia sira organiza ema rihun ba rihun iha embaixada Australia nia oin hodi husu ba Governu Australia atu fó fila direitu povu Timor-Leste nian ne'ebé Australia ho nia podér polítika no ekonomia hadau hosi rai ida ne'e.

Ami hanoin katak parseria ida ne'ebé di'ak mak bainhira parte ida respeita ida seluk nia soberania, no direitu sira bazeia ba prinsipiu no direitu internasionál. Tanba ne'e, iha oportunidade ida ne'e ami kontinua husu ba Parseiru Dezenvolvimentu sira hotu, especialmente Governu Australia, atu rona povu ida ne'e nia halerek, respeita povu ida ne'e nia sakrifisiu bainhira harii nasaun ida ne'e ho ran no ruim besik ema rihun atus rua no rihun atus seluk nia trauma tanba tortura no konfliktu naruk nian.

Mak ne'e de'it ami nia komentáriu ida ne'e ami hato'o, espera katak polítika doador sira no mós Governu Timor-Leste bele refleto hosi perspetiva ida ne'e atu asegura dezenvolvimentu ida ne'ebé sustentável duni.

Obrigado barak ba ita boot sira ne'ebé konsidera ami nia idea sira, no ami sempre pronto atu fornese informasaun adisionál sira kona ba asuntu ruma ne'ebé ami diskute ona iha leten. Iha informasaun barak mak bele hetan iha ami nia website, www.laohamutuk.org.

Ami be saran lia,

Juvinal Dias

Charles Scheiner

Adilson da Costa Junior

Marta da Silva

Celestino Gusmão

Niall Almond

Peskizadór sira iha ekipa Ekonomia no Rekursu Naturais